

ANR: 20 onns en servetsch da la pressa rumantscha

(pd) L'Agentura da novitads rumantscha (anr) po festagiar quest onn 20 onns d'activad fritgaivla. Ils servetschs da l'agentura furman ina contribuziun impurtanta per il mantegniment e la promoziun da la lingua rumantscha. L'Agentura da novitads rumantscha è vegnida fundada durant il zercladur 1996 ed ha cumenzà sia lavur operativa a l'entschatta da schaner 1997 cun l'emprim numer da la gasetta quotidiana rumantscha La Quotidiana. L'agentura da novitads ha la finamira da sustegnair ils meds da massa rumantschs – en emprima lingia la pressa rumantscha. L'anr furnescha als meds stampads rumantschs La Quotidiana, «La Pagina da Surmeir» e «Posta Ladina» sco er als meds electronics rumantschs mintga di contribuziuns en furma da texts e fotografias. Questas contribuziuns vegnan scrittas en tut ils idioms rumantschs sco er en rumantsch grischun. Ils idioms vegnan utilisads per novitads localas e regionalas, la lingua da scrittira rumantsch grischun vegn utilisada per novitads e comunicaziuns che pertutgan tut la cuminanza da lingua.

Pitgas impurtantas per ils meds da massa

Cun sia gronda purschida s'ha l'anr etablida sco ina pitga impurtanta dals meds da massa rumantschs, surtut dals meds stampads. L'anr contribuescha sia part per che La Quotidiana possia cumparair en la grondezza odierna. Per cuntanscher questa finamira collavuran las duas redacziuns stretgmain. Er ils dus auters products stampads rumantschs «Posta Ladina» e «La Pagina da Surmeir»

fissan senza il sustegn da l'anr ferma-main periclitads. Perquai èn ils servetschs da l'Agentura da novitads senza dubi ina da las mesiras las pli impurtantas ed effzientas per mantegnair e promover la lingua rumantscha. Cun sias structuradas ligeras po l'anr accumplir da maniera efectiva ed individualmain ils giavischs dals clients dals meds stampads; ils servetschs actuals da l'anr statan er en ina fitg buna relaziun da custs e nizzs.

Cussegli da fundaziun da l'anr

Las organizaziuns purtadras da l'anr èn organisadas en furma d'in cussegl da

fundaziun che vegn presidià da *Martin Gabriel* da Glion. Mintgamai in sez en il cussegl da fundaziun han ils editurs dals meds stampads rumantschs (La Quotidiana, «La Pagina da Surmeir» e «Posta Ladina»), ils purschiders rumantschs da radio e televisiun (RTR ed RSO), la Lia Rumantscha sco era la Pro Svizra Rumantscha. Finanziada vegn l'anr dal maun public. Il budget annual per l'import da var 1,2 milliuns francs vegn finanzià per in terz dal chantun Grischun e per dus terzs da la confederaziun. Da quest budget total survegn la «Pagina da Surmeir» mintg'onn 100 000 francs sco pajament direct.

Emploiads stabels e collavuratur libers

Operativmain vegn l'anr manada da *Guido Jörg*. L'Agentura da novitads dat lavur a diesch collavuraturas e collavuratur stabels cun in volumen dad 800 pertschient da plazzas da lavur. Las plazzas da lavur sa chattan en la redacziun centrala a Cuira sco er a Mustér, Cumpadials, Vuorz, Sagogn, Sur, Scuol ed Uznach.

Ultra da quai èn totalmain 12 collavuraturas e collavuratur libers en Surselva, en la Val Schons, en Engiadina, en il Surmeir sco era giu la Bassa activs per l'anr.



Il biro central da l'Agentura da novitads rumantscha anr sa chatta sper il biro da l'Agentura svizra da novitads SDA en la Chasa da medias dad RTR a Cuira.